



2020-imut aningaasanut inatsisissatut siunnersuut.

(Aningaasaqarnermut Naalakkersuisoq)

(Aappassaaneenera)

2020-imut aningaasanut inatsisissatut siunnersuutissap suliarinera qangalili ingerlaarpoq. Aningaasaqarnermullu ataatsimiititaliami siunnersuut peqqissaarullugu suliarisimavarput.

Aallaqqaammut oqaatigerusuppara suliaq suli naammassineqanngimmat. Matumuuna aappassaaneernerani siumut ingerlariaalaarsimavugut, sulili amingateqaqaagut.

Demokraatit aningaasaqarnermut ataatsimiititaliami aammalu partiitta Naalakkersuisullu akornganni isumaqatigiinninniarnarit pisussat qilanaariavaat.

Angorusutarput allanngorsimangilaq. Aningaasanut inatsit minnerpaamik oqimaaqatigiiffiusoq piumavarput. Aningaasanut inatsit inuussutissarsiornikkut sinaakktissatut piumasaqaatinut pitsanngorsaasoq piumavarput. Aningaasanut inatsit isumaginninnermi unammilligassarpassuarnut pingaartitsisoq piumavarput.

Maluginiagarput siulleq tassaavoq Naalakkersuisut isumaqatigiinninniarnarni aqquq eqqortoq ingerlavigigaat, neriutigilluarparpullu Aningaasanut Inatsit pingajussaaniinnginnerani siammasissumik isumaqatigiissusiortoqassasoq. Taamaakkaluatorli isumaqartoqassanngilaq isumaqatigiinninniarnarit ajornaatsuussasut. Partiiunngilagut imaalitsiaannaq sunut tamanut atsioqataarusuttut. Eqqortumut ingerlasoqarnera takusinnaasariaqarparput. Imaassinnaavoq arriitsunnguamik ingerlaartariaqassasugut, ornitarpulli eqqortuusariaqarpoq. Tamanna qularutigineqassanngilaq.

Aningaasanut inatsisissamut missingersuut allannguutissatullu siunnersuuterpassuit kisiisa isigissagutsigit matumuuna aappassaaneernerani oqaatigisariaqarparput ajortoqartoq, aqqullu eqqortuunngitsoq ingerlavigigipput. Siunnersuut massakktut isikkoqarluni 2020-imut amingartooruteqarpoq, aammalu ukiunut sisamanut tulliuuttunut katillugit amingartooruteqarluni. Taassumallu saniatigut isumaqarpugut inuussutissarsiortunut sinaakktissatut piumasaqaatit pitsaanerpaaffimminiitinnissaanut suliniuteqartoqarsimangitsoq.

Taamatut oqareerluta ajunngitsuusoraarput Aningaasanut Inatsisissamut allannguutissatut siunnersuutini ilinniarfissanut marlunnut aningaasaleeqqittoqassammat, peqqinnissamut ikiortitut ilinniarfik holdit allat saniatigut holdimik nutaamik aallartitsisoqarsimanera, aammalu Niuernermit Ilinniarfimmi bachelor-itut ilinnigassat marluk qangalili utaqqineqarsimasut aallartitsisoqarsimanera peqqutaallutik.



Aningaasanut inatsissaq oqimaaqatigiiffiulernissaa anguniarlugu partiitut pingaaruteqarpoq isumaqatigiinninniarnernut kissaaterpassuagut taamaallaat nassarlugit takkutissannginnatta, isumarpulli malillugu tutsuiginartumik sipaarfiusinnaasunut siunnersuutinik aamma saqqummiisariaqarpugut, tamannalu neriutigaarput partiit tamarmik inaarutaasumik isumaqatigiinninniarnerni eqqaamassagaat.

Oqareernittullu neriullualarpugut. Isumaqatigiinninniarnernut ingerlasunut ilimasulluarpugut, piffissamilu qaninnermi aningaasanut inatsit pillugu isumaqatigiissut siammasissoq eqqortumullu ingerlanissamut qulakkeerisumik isumaqatigiissuteqarsinnaanissarput upperaarput.

Taamatut oqaaseqarluta siunnersuut Aningaasaqarnermut Akileraartarnermullu Ataatsimiititaliamut pingajussaaniinnginnerani innersuupparput.